

Remitido Premiacion Motito/ Rufo Wever

Permiti mi un espacio den bo corant pa mi por trece algo dilanti. Di antemano, masha danki.

Pa cuminza mi kier a desea boso un feliz y venturoso aña nobo.

Mi ta referi na e presentacion di Premio Mo Tito/Rufo Wever, cu a tuma luga na cabamento di aña 1988 na Tele Aruba.

Nos ta papia hopi di progreso na Aruba y berdad ta cu tin hopi señal di progreso na Aruba. Progreso kiermeen tambe entre otro haci cos mihor. Sinembargo esaki no ta e caso 'ariba tur tereno'. Por ehemplo e organizacion Promocion Cultura Aruba enbez di progresa, na mi opinion e ta retrocede (bay atras) y esaki debi na e mentalidad miskiña di su miembronan.

Si e presidente di e organizacion aki y su consorcio kier reparti plaquette manera nan ta haya ta bon, ta nan pleno derecho, pero no uza nombernan manera Mo Tito/Rufo Wever pa nan bagamunderia. Pasobra esaki ta desprestigia e Premio Mo Tito/Rufo Wever. Cu otro palabra e ta kita e balor di e premio pa esnan cu a ricibie caba y esnan cu lo ricibie den futuro.

Un reaccion entre e hopinan cu mi a tende ta: "Ta parce cu e organizacion ta hinca man den un grabbelton y saca e premionan. Algun ta resulta y e otro nan no. Por ehempel, ariba tereno di baile, esaki tabata e vupa di aña.

Suscrito su reaccion mes lo no a aparece, si no ta pa e hecho cu e presidente di e organizacion na final di e programa, cu un cara seco, a declara cu tur e nominadonan ta mes bon, mes grandi y no menos cu otro. Ta asina cu a blink mas durante e aña 1988 a worde premia.

Mi ta puntra mi mes si e persona aki sa e nificacion di e palabra blink (uitblinken), den e caso aki "destaca". Mi ta duda cu si e persona aki haya un pida cristal sushi y un pida diamanta puli su dilanti, cu e no por weita e diferencia.

Tambe a worde menciona algun cos cu e ganadornan a haci pa por a merece e premio. Lo tabata mihor si e presidente a menciona e cosnan cu e nominadonan no a haci (sigur den e caso di baile) pa por a merece ser premia. Asina e

publico por a compronde e criterio di e organizacion mihor.

Hopi biaha bo ta tende: "Caminda tin hende ta traha, errornan ta worde cometi". Mi lo kier a cambia e dicho aki den: "Caminda tin hende di mala fe ta traha, errornan semper ta worde cometi".

Biniendo bek ariba tereno di baile, mi kier a remarca cu e video cu a pasa di un baile di e grupo ganador, talvez pa impresion y prepara e caminda pa e premiacion, tabata mal escohi. Pasobra, e grupo envez di baila e tumba cu a worde toca, tabata baila un tambu.

Awendia, presentacion di baile pa publico no ta solamente subi ariba pista ay janga e parti patras, pero mester tin coreografia. Y esaki hopi grupo no tin. Es mas e integrantesnan, envez di a

progresa, tambe a bay atras, lubidando locual nan a siña tempo nan tabata forma parti di Teatro di Danza Arubano.

Mi no ta culpa nan cu nan a haya e premio, pero si esnan cu a otorga e premio. Quizas e ultimonan aki s mihor, pero atrobe e mentalidad a sobreponer. Mi ta puntra: "Pakico boso no ta cambia y asina evita critica?" No ta costa nada.

Pa finalisa, mi kier a felicita sra. Astrid Salazar cu e reconocemento bon mereci, aunke esaki a yega hopi laat.

Masha danki
Number y adres conoci na redaccion